

दिनांक : 05.02.2026

समय : 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी कह्यो-भारत भविष्य की जरूरतों ने ध्यान मांग रखता कई देशों के साथे कारोबारी समझौता कर रियो है।
- मुख्यमंत्री भजन लाल शर्मा विधानसभा मांग कह्यो-वां की सरकार की कोशिशों ऊं लारला दो सालों मांग राज्य की माली बंदोबस्त मांग सुधार द्यो।
- मुख्यमंत्री जयपुर मांग इण्डिया स्टोन मार्ट की उद्घाटन कर्यो-पत्थर उद्योग की विकास की सरकार की प्रतिबद्धता दोहराई।
- प्रधानमंत्री की परीक्षा की चर्चा कार्यक्रम काले संवारां 10 बज्या प्रसारित व्हेला-सरकारी अर निजी स्कूलों मांग पढेसरां की कार्यक्रम दिखावण सारू खास बंदोबस्त।

000

प्रधानमंत्री नरेन्द्र मोदी कह्यो के भारत आज दुनिया की कई देशों के साथे भविष्य की जरूरतों ने ध्यान मांग रख र कारोबारी समझौता कर रियो है। आज राज्यसभा मांग राष्ट्रपति की अभिभाषण माथे धन्यवाद प्रस्ताव की जवाब देवता वणों बतायो के लारला कुछ बगत मांग दुनिया की 9 मोटा देशों के साथे ट्रेड डील दस्तखत करीजी है। वणों इण ने 'मदर ऑफ ऑल डील्स' बताता कह्यो के ई मांग 27 देशों के साथे करा र भेळा है, जिण मांग यूरोपियन यूनियन ई हिस्सो है। प्रधानमंत्री कह्यो के विकसित भारत की जात्रा मांग लारला साल देश मांग तेजी ऊं विकास की काल रियो है। वणों जोर दियो के आज भारत एक दुर्लभ अर अनुकूल दौर उं गुजर रियो है जठे दुनिया की कई विकसित देश बुजुर्ग आबादी की चुनौती की सामनो कर रिया है वठे भारत आप की नौजवान शक्ति की दम माथे आगे बढ रियो है।

000

लोकसभा राष्ट्रपति की अभिभाषण माथे धन्यवाद प्रस्ताव ने ध्वनिमत पास कर दिया है। राष्ट्रपति द्रौपदी मुर्मू लारला महीना की 28 तारीख ने संसद की दोन्यू सदनों की भेळी मीटिंग ने संबोधित कर्या हा। लोकसभा अध्यक्ष ओम बिरला राष्ट्रपति की अभिभाषण माथे धन्यवाद प्रस्ताव सारू चर्चा सरू करी। श्री बिरला धन्यवाद प्रस्ताव माथे विपक्ष की लाईज्या संशोधन माथे मतदान करावण की बात ने नामंजूर कर दिया। विपक्ष की हंगामा बीचे लोकसभा धन्यवाद प्रस्ताव ध्वनि मत ऊं पास कर दिया।

लोकसभा अध्यक्ष कह्यो के अबे सदन मांग केंद्रीय बजट 2026-27 माथे चर्चा करी जायेला, जिण की दौरान हर सदस्य ने बोलण की मौको दियो जावेला।

000

मुख्यमंत्री भजनलाल शर्मा कह्यो है कै वां री सरकार री कोशिशं ऊं लारला दो सालां मांय राज्य री टेक्स अर्थव्यवस्था मांय सुधार व्ह्यो है अर प्रदेश रा माली बंदोबस्त अर स्वस्थ्य रा हलका मांय नवाचारां री सराहना केन्द्र सरकार रा आर्थिक सर्वेक्षण मांय ई करीजी है।

मुख्यमंत्री आज विधानसभा मांय राज्यपाल रा अभिभाषण माथे धन्यवाद प्रस्ताव माथे व्ही बहस रो जवाब दे रिया हा। वणा कह्यो के प्रदेश रा राजस्व घाटा मांय बरोबर कमी आय री है। वणां बतायो के राज्य मांय महंगाई माथे असरदार काबू करी ज्यो है। साल 2023–24 मांय महंगाई री रेट 6 दशमलव 39 फीसदी ही, जो साल 2024–25 मांय 4 दशमलव 3 फीसदी अर 2025–26 मांय घट ने फगत शून्य दशमलव एक फीसदी रह गयी है। वणां ओई कह्यो के लारली सरकार री तुलना मांय केन्द्र ऊं बत्ती मदद हासिल कीनी।

मुख्यमंत्री कह्यो के राजस्थान 11 जनकल्याणकारी योजनाओं मांय देश पैली ठौड़ा माथे अर पांच योजनावां मांय दूजी ठौड़ माथे रह्यो है। वणा बतायो के राज्य दो आयामा मांय 'बेस्ट परफॉर्मर स्टेट' रो खिताब हासिल कीनो। नहरी तंत्र री मजबूती माथे जोर देवता मुख्यमंत्री कह्यो के 100 साल पुरानी गंग नहर प्रणाली रा आधुनिकीकरण अर नहरां री कंक्रीट लाइनिंग सारू कोई 1,717 करोड़ रिप्यां रो बजट आवंटित करी ज्यो। वणा बतायो के जल जीवन मिशन रो बगत साल 2028 ताई बधा दीरीज्यो है।

000

मुख्यमंत्री भजनलाल शर्मा कह्यो है के राज्य मांय 85 भांत रा खनिज मौजूद है अर प्रदेश री सरकार भाटा रा कारोबार ने देश रो सिरमौर बणावणो तय कर्यो है। वे आज जयपुर मांय इंडिया स्टोनमार्ट 2026 रा उद्घाटन जळसा मांय बोल रिया हा। मुख्यमंत्री कह्यो के 'राइजिंग राजस्थान' समिट रा तैत करी ज्या 35 लाख करोड़ रूप्या रा न्यारा-न्यारा करार मांय ऊं 8 लाख करोड़ रूप्या रा काम सरू व्हे गया है। श्री शर्मा कह्यो के राज्य रा भाटा री दुनिया मांय न्यारी पिछाण है अर ओ कारोबार नुवी ऊंचाइयां हासिल करण सारू तियार है।

मुख्यमंत्री ई मौके भाटा रा हलका मांय चौखो काम करण वाळा कारोबारियां ने लाइफ टाइम अचीवमेंट रा मान ऊं नवाज्या। कार्यक्रम मांय उद्योग मंत्री राज्यवर्धन सिंह राठौड़ कह्यो के नुवी नीतियां अर सिंगल विंडो सिस्टम ऊं कारोबारियां ने आराम दियो जा रियो है। इंडिया स्टोनमार्ट 2026 नुमाइश 8 फरवरी ताई चालेला।

0000

प्रधानमंत्री नरेंद्र मोदी रो 'परीक्षा पे चर्चा' कार्यक्रम काले संवारा 10 बज्यां प्रसारित क्यो जावेला। ई कार्यक्रम न ले र प्रदेश रा पढेसरा मांय घणो उमाव है। पावटा री आरोही बतायो के प्रधानमंत्री कानी ऊं दिया जावण वाळा सुझाव ऊं बगत रो बंदोबस्त अर तनाव लियां बगैर पढ़ाई करण मांय मदद मिले है। वणा कह्यो के ओ कार्यक्रम पढेसरा ने परीक्षा रा दबाव रो सामो करण रा गुर सिखावे है।

0000

राजस्थान माध्यमिक शिक्षा बोर्ड री 10वीं अर 12वीं कक्षा रा पढेसरा रा इम्तेहान 12 फरवरी ऊं सुरू व्हे जायेला। बोर्ड सचिव गजेंद्र सिंह राठौड़ आ जाणकारी दी। वे बतायो के ई सारू बोर्ड रा अजमेर दफ्तर मांय कन्ट्रोल रूम थापित करी ज्यो है। पढेसर अर वां रा मांत-पिता परीक्षा रा बारा मांय आवण वाळी परेशानियां अळगी करण सारू तय फोन नम्बरां माथे बतळ कर सके है। श्री राठौड़ बतायो के इम्तेहान देवण सारू कोई 20 लाख पढेसर नाम मंडाया है। ई सारू राज्य मांय 6 हजार 193 सेंटर बणायी ज्यो है। मैट्रिक री परीक्षा 28 फरवरी अर बारहवीं री परीक्षा 10 मार्च ताई चालेला। झुंझुनूं जिला मांय बोर्ड परीक्षा सारू 244 सेंटर बणायी ज्यो है, जठे हिफाजत रा करडा बंदोबस्त रे बीचे जिम्मेदारां ने पेपर बांट्या जा रिया है। जिला शिक्षा अहलकार राजेश मील बतायो के हिफाजत ने ध्यान राखता पेपर वठे रा पुलिस थाणा अर चौकियां मांय राख्या जायेला। परीक्षा ठीक ढंग ऊं करावण सारू पेपर को-ऑर्डिनेटर अर माइक्रो ऑब्जर्वर तैनात करी ज्यो है।

000

राजस्थान संपर्क पोर्टल माथे शिकायतां रा निपटारा रा मामला मांय सवाई माधोपुर ज़िलो प्रदेश मांय ठावी ठोड रियो है। जिला कलेक्टर काना राम आ जाणकारी दी। वे बतायो के लारला महीना मांय ज़िला मांय 68 दशमलव 70 फीसदी शिकायतां रो निपटारो करीज्यो अर लोगां री संतुष्टि 77 फीसदी री। सवाईमाधोपुर ज़िला मांय शिकायतां औसतन 14 दिन मांय निपटा दीरीजी। रैंकिंग मांय झालावाड़ दूजी अर अलवर तीजी ठोड माथे रह्यो। कलेक्टर बतायो के जिला मांय कोई शिकायत 6 महीना ऊं बत्ती नी अटक्योडी री।

0000

वरिष्ठ नागरिक तीर्थ यात्रा योजना' रा तैत आज हनुमानगढ़ रेलवे स्टेशन ऊं तिरुपति बालाजी सारू खास रेलगाडी रवाना करीजी। 6 दिन री यात्रा सारू निकळी ई गाड़ी मांय प्रदेश रा 960 जातरू तीरथ सारू जा रह्यो है। देवस्थान महकमा रा सहायक आयुक्त ओमप्रकाश सिंघवी बतायो के जातरूआं रा सुबीता सारू रेल रा हर डिब्बा मांय सरकारी कर्मचारी अर जाणकार डॉक्टरां साथे स्वास्थ्य री देखभाल करण वाळा कर्मचारी तैनात करी ज्यो है।

0000